

Jenggo 'serang' Segamat, rezeki selepas monsun

UM 16/1/2023 MS: 30

Oleh FARAHWAHIDA AHMAD
utusannews@mediamulia.com.my

SEGAMAT: Musim monsun atau tengkujuh yang baru berlalu sering dikaitkan dengan musibah banjir dan arus deras yang meresahkan penduduk terutama golongan nelayan.

Walau bagaimanapun, ada hikmah di sebalik berakhirnya fenomena alam itu apabila turut memberikan rezeki kepada nelayan darat di sekitar Sungai Segamat.

Udang galah atau lebih dikenali sebagai 'jenggo' oleh para pemikat sepit biru ini mula 'berkampung' di sungai sekitar daerah ini setiap kali berakhirnya musim tengkujuh.

Seorang nelayan, Rosdi Ismail, 59, mengakui terkejut dengan hasil tangkapan udang galah yang luar biasa.

"Saya amat terkejut ketika memukat udang baru-baru ini apabila berjaya menaikkan ratusan ekor udang galah. Saya dan rakan amat bersyukur pada musim ini pendapatan kami meningkat hampir empat kali ganda dan ini tidak pernah berlaku sebelum ini.

"Selain itu, faktor cuaca dan keadaan air sungai, hasil tangkapan udang galah berganda kali ini juga bukti keberkesanan pelepasan ribuan benih anak udang galah ke dalam sungai-sungai di sekitar Segamat," katanya ketika ditemui *Utusan Malaysia* di Kampung Tengah, dekat sini.



MOHD. Faiz Ahmad menunjukkan hasil tangkapan udang galah bersaiz besar atau 'jenggo' di Sungai Muar, Segamat, Johor, baru-baru ini.

Rosdi berkata, pelepasan ribuan benih anak udang galah sebelum ini adalah hasil usaha agensi berkaitan bagi menambah bilangan hidupan marin itu di Sungai Segamat, Sungai Chodan, Sungai Pudu dan Sungai Batu Badak.

Dia yang telah lebih empat dekad bekerja sebagai nelayan pukat ambai di Sungai Segamat mengakui hasil yang diperoleh mampu mencecah 100 kilogram (kg) sehari.

Pemburu dan pemancing udang galah, Mohd. Faiz Ahmad, 34, sering turun bersama-

sama rakannya pada hujung minggu atau cuti umum.

"Di Sungai Segamat, saiz udang galah lebih besar kali ini dengan isinya lebih manis dan kenyal. Biasanya kunjungan ke Sungai Segamat tidak menghampakan, tidak pernah pulang dengan tangan kosong.

"Musim ini purata hasil tangkapan diraih memang luar biasa apabila mencecah antara empat hingga lapan kilogram," katanya sambil memberitahu air yang tenang dan jernih ialah keadaan yang sesuai mengail udang galah.